

余山集再續集

龔山續集

皖桐方文爾止著

壻繡水王槩安節訂

七言古體

市隱園歌贈朱石者少叅

壬寅

南都名園八九區此園絕勝他所無出水芙蓉香十畝
叅天楊柳青千株板橋曲折行水上東西樓閣紛相望
四時風景靡不佳長夏披襟更休暢憶昔姚生居此中
伯我時來就池上風金陵變後主人換十年不見蓮花
右紅今日偶然行至此主人好客因留止新秋林壑澹忘
歸况復壺餐多且旨醉卽褫衣掛薜蘿夜涼露樂如
何蚤知主人意能爾悔不盛夏頻相過

學山艸廬歌贈閻牛叟

學山在何所乃在淮郡東南隅大小巒巒數十丘形如
衆星落平蕪中有一丘最靈異四時艸樹長青翠閭子
卜葬其先人茲山信是眠牛地更向山邊結艸廬春秋
伏臘來此居夜聞啼鳥必墮淚朝聞風木惟增歎古人
原有終身喪不因服盡哀思忘今人親死多不葬反笑
廬墓爲荒唐閭子孝思天所篤復有才子爲之續少年
文采類鴛鴦指日飛騰邁鴻鵠艸廬艸廬良足多棘人
高枕臥煙蘿上有厥父下厥子俯仰之間樂如何徐生
爲作學山艸廬圖方生爲作學山艸廬歌

送徐石林還彭城兼懷李孝乾陳善長吳中黃萬
瞿客諸子

昔年我作彭城游彭城好友爭相留君本吳人亦家此

含風咀雅無其儔所以邂逅便傾倒况是若翁廿年好
雲龍山上醉春醪戲馬臺前踏秋艸別來消息不相聞
但見名流必道君宋萊陽與李東鹿皆因我故情殷勤
今年重往山東路停舟淮水忽相遇索飲先過閭叟家
傷離又乞僦山句是時八月天微涼小舫欲返黃茅岡
岡下故人如見問爲言吟鬢已蒼蒼

書吳晦之詩後歸其兄子公綽

休寧處士吳晦之一生好作中晚詩孤情冷韻似郊島
老死巖穴無人知羣從之中有公綽搜其遺稿半凋落
八卷惟餘四卷存律體甚多古體略以示吾友潘江如
江如賞玩復歛獻選其精要二百首錄成字字皆瓊瑤
予謂公綽此鴻寶闢幽亟宜付梨棗古詩尋得誠大觀

卽無古詩律亦好

濟寧遇五兄凝齋卽送其南歸

我來任城日兄去任城時離羣鴻雁旣已久安忍接翼
還參差今宵且莫登舟去枕被同眠觀察署燈前酒盡
話偏長窓外雞鳴天欲曙榜人催上大河船又是蕭蕭
風雨天約略囊金無二十往來客路有三千到家資斧
能餘幾勿復謀居向城裏犁鉏祇合種山田經傳尤宜
教孫子我年五十亦蹉跎故國無家作客多爭得衡茅
共林壑白頭兄弟時相過

送姚彥昭還里兼懷陳二如都下

里門通籍者不少孰若姚生陳生才才高轉不得科第
同時鄉貢良可哀今春驅馬入京國過我艸堂傾一杯

我疑二子貌魁岸必有奇遇黃金臺那知資格不肯破
艸艸廷試仍歸來泊舟濟水忽相遇面上顰黑多塵埃
問我何之往歷下爾亦南歸舟師催今宵暫宿分司署
主人初度羅罇罌莫愁客裏資斧盡且喜花前笑口開
獨惜陳生在都下泥塗潦倒何時迴

李漑林叅知九日招飲謝之

去年九月日南昌城觀察署中聞雨聲

周伯衡也

今年九日濟

南郡又向藩司看月明兩年晴雨各異候孤客蕭騷同
一情所幸主人皆夙好相逢杯斚先傾倒使君高義更
嶙峋推食授衣非艸艸堦前秋菊幾經黃頭上霜華行
漸老我老秣合棲柴關底事風塵往復還平生癖好在
山水不因知已難躋攀使君若有登高興明日追陪上

嶧山

東姜真源憲副

時丁內艱將歸

往歲停舟淮北路使君一見歡如故公讌相從十日飲
頗行贈我三絕句感此意氣未能忘尚冀從容展良晤
昨歲南遊豫章城我到使君已先去惟聞僚友說風流
每對黃花惜遲暮今年東遊至歷下使君又復悲風樹
行將讀禮返田園不暇留賓問詩賦稍喜張諸兩詞伯
祖望駿男皆真源署中客無事相過一閒步探泉先詣大明湖看雲
又上華不注畢竟囊空乏酒錢索醉還來使君署

同張祖望諸駿男遊歷山歸飲酒家醉後作歌

歷下當年有邊李先後詞壇執牛耳山川靈氣盡於斯
無復才華能繼起我今求友來山東但覺歷城風俗鄙

客居愁寂偶閒行忽遇舊交驚且喜因而連轡出西門
趵突亭邊訪樂源南望歷山路非遠其中千佛巖尚存
策杖登高氣清爽馳馬下坡天黃昏今朝安忍遽離別
須向酒家謀一罇諸君自言將北走張翁又欲之淮右
我雖乍到亦思歸趁此秋晴頻聚首邊李詩篇何足奇
嵒華風景還依舊只是岱宗咫尺間二子不登應罰酒
同黃愚長遊石經峪

泰山之北黃花洞泰山之南石經峪是爲岱宗絕勝處
泉壑雲松看不足可笑世人來遊者千百曾無一寓目
聞人黃生好探奇山頭名勝無不窺下山獨未到石峪
忽聞我說心神馳來朝僕馬催歸去且爲迴鞭覓山路
邀我同行我不辭崎嶇廿里須徒步石上何人書此經

八分瘦硬存典型水簾傾瀉入深澗老樹扶疎覆古亭
黃生丹青稱妙手乞寫此圖贈爾友冬月攜歸白下城
挂我艸堂垂不朽

贈嚴水子山人

暨陽高士陳章侯丹青天下無與儔中間人物更奇古
不摹唐宋摹商周絕技何人能紹此及門乃有嚴水子
慧心盡得其神妙人歎章侯爲不死偶然作客齊魯間
五載蹉跎尚未還山東好事者極少筆精墨妙如等閒
仕宦誰能愛風雅前有宣城後大冶施尚白兩公賞鑒
最相知所以淹留於歷下我昔魯遊曾識君今冬相遇
情慙慙雪中送酒來僧舍燈下圍爐坐夜分却愁明日
子歸促別意徬徨霜氣肅特寫詩人劉長卿老抱雙珠

爲我祝感君此意不能忘兼之繪事超倪黃開春若返
山陰棹便道青溪問艸堂

贈戴絲如明府

歷下栖遲將兩月邊李風流竟銷歇塊然獨處無友生
歲暮思歸待明發道旁偶遇臨邑侯傾蓋一語情相投
黃昏見訪城西寺便約我爲花縣遊今人仕宦惟趨勢
山水詩文都棄置平生夙好亦浮雲豈有新交反招致
我自不宜妄干人感君此義何嶙峋朔風吹雪重裘冷
不待持盃先飲醇劉將軍家有美酒與君偕過傾一斗
今宵痛飲定交期他日相逢成故友

元旦

以下癸卯年作

先君四十始成名又過十年兒始生五十生兒猶恨晚

我今五十有二仍孤嫠每逢冬盡春初節家廟拈香慘
不悅祖宗譜系遞相承忍至吾身中道絕開春癸卯更
悽然正是先君鄉舉年富貴功名非所望惟祈書種種
書田

王元倬先生七十

君生萬曆之癸巳鄉舉崇禎之丙子眼見國家全盛時
抱道含章猶不仕何況暮年逢亂離柴桑安忍改義熙
且酌寒泉拾香艸南陔戒養中心怡昨歲初冬介眉壽
江國人人問耆舊我去山東今始歸欲補一觴君不受
春來兩雪梅花寒花下提壺強自寬莫學康浪怨長夜
磻溪此日正垂竿

送兄子象山遊姑孰兼寄唐祖命張兆蘇曹梁父

吹臺孔千一諸子

爾來驚峰甫兩月新詩百首猶未歇我亦天下苦吟人
那能似爾才超越少年工爲制舉文思如泉湧如風發
心血嘔盡名不成仰首雲霄空咄咄四十以後工詩篇
閉戶揣摩同少年始猶蘭苔集翡翠近乃鴻鵠摩蒼天
今春懷友到白下因之訪舊遊姑川此中謝李風流在
爾去逢迎合有緣

喜孫豹人見訪予爲稍遲虞山之行因作歌

三月八日天氣晴方子將作虞山行虞山老人八十二
郵書期晤情非輕吳舫已買泊江口却有王郎飲我酒
牽衣不忍遽離別初八改期於初九故人孫老廣陵來
知我欲行船未開黃昏策蹇入城市馳書告我且徘徊

詰朝見枉桃葉渡預勅山妻手治具五年魂夢只思君
豈有君來我翻去信信宿宿爲君留十五始上江口舟
不教虛此數日夜日日痛飲青溪樓昔王百穀將之越
艤櫂閭門待明發忽逢元美兄弟來復返蘇臺醉旬月
我今情事正相同又是鶯花二月中只合持杯共傾倒
那堪分手各西東

王郎謂山史

櫻桃行荅周兼三見遺

京口櫻桃天下無圓勻一似珊瑚珠始摘嘗新更珍異
土膏露氣方涵濡所以古人南遊者櫻桃時節偏風雅
我今與爾客京江何幸春殘又初夏恰逢野老送櫻時
君復分甘遺所思莫愁內熱須寒蔗只當蠻鄉啖荔枝
常州顯慶寺訪楊逢玉留飲作歌

鼎湖龍去二十年志士強半歸黃泉雖有存者窮且老
加以患難多憂煎屈指惟君天所祐家人生產還依舊
二子俱爲偉丈夫諸孫又挺山川秀君意超然遠絕塵
荒郊破寺藏此身父子自相爲師友衣食粗足何憂貧
况乃中年能絕慾布被繩牀甘獨宿形容肥澤髭未霜
意氣飛騰量猶瀆架上偏多理學書胸中見道長炯如
性命之事既了了世間文字皆麤疎我昔與君稱好友
會日苦稀離日久今來東郭訪幽棲自摘園蔬飲我酒
酒闌感歎復悲歌天運茫茫可奈何高士如君世應少
窮人似我亦無多

與惲仲升感舊并呈王雙白楊逢玉

憶昔癸酉京兆試與君定交高座寺是時君年三十三

我方二十稱同志論文爭尚先輩風自謂咫尺銀河通
豈知盛壯俱落魄况經離亂各飄蓬今年重晤毗陵邑
君過六十我五十年看鬚鬢已成絲話到滄桑惟飲泣
此間舊友王與楊寒花幸不萎雪霜安得移家伴三老
禪牀瓢衲日相望

常熟訪錢牧齋先生

賤子童年性超忽特地辭家泛溟渤曾向虞山訪鉅公
絳雲樓上瞻風骨是時婣淺無所知莫測高深惟歎咨
及壯始窺初學集朝吟夕誦勞吾思厥後爲儒逢世難
衣冠文物皆塗炭巋然獨有魯靈光顛顛支離東海岸
每愁風雅道紛綸品定列朝諸詩人不辭好辨爲剖晰
遂令蕤苑開荆榛前歲磻溪介眉壽遠近爭趨如恐後

欲偕林叟來持觴先遣長書謝親舊却寄龔山詩一章
謬稱國手何敢當私喜平生說詩意與公符合爭微芒
去年九日期相訪作客山東絆塵網今年仲夏身蕭閒
始到琴川擊雙槳三十年來臭味同好將疑義質宗工
忽聞都市焚書令鐵篋惟應寘井中

錢牧齋先生招飲荔枝酒酒後作歌

有客來自五羊城手攜荔枝酒一罍云是荔枝漿所釀
以餉虞山錢先生先生安置牀頭久欲飲還須待良友
忽聞我到意欣然亟喚侍兒開此酒我從未啖鮮荔枝
今茹此味方知之色如玉露初寒日香似輕紅乍擘時
古筴頻勸不肯止先生愛我乃如此何以報之惟藥方
社酒治龔加鐵矢

先生時病耳

答錢夕公感舊之作

我年二十君加三相遇虎丘碧雲庵意氣飛揚才調合
扁舟直至虞山南別後兵戈不相見三十三春倏如電
垂白重登君子堂驟看莫識當時面追憶舊交多死亾
長洲華亭爲國殤楊維斗陳死於法者殊可惜周介生
輩死於盜者尤堪傷錢吉士徐爾我餘生且喜在努力
著書期有待但使詩卷長留天地間窮老羈愁復何慨
揚州訪王貽上司理并爲其三十初度

漁洋山人王阮亭

貽上別號也

吐詞璀璨如華星世人疑爾

必耆艾誰道今年始壯齡廣陵八月逢初度邵齋瑤州

園瓊樹五鼎雙承堂上懽連枝又獻山東賦

令兄子側捷音方至

君家介福何其多野夫奈拙言詞何舉杯朗詠惟君句

萬歲千秋定不磨

去年七夕客蕪城與君一見遂北征賦詩送我追不及
歸來把玩知君情今年九日蕪城客與君相見又忽迫
佳晨且盡黃花盃高秋卽有青州役青州迢遞海西頭
東馬將行還復休商風吹折隋堤柳試問遊人愁不愁
枕上聞風雨聲

秋雨打窓天未曙狂風威發吹庭樹遙憐江上泊船多
此際驚憂奈若何小灣聯絡猶自可極浦飄搖愁殺我
老夫年年好遠行每聞風雨最關情

魏崑林冢宰龔芝麓總憲同時惠書感贈

江城苦雨連昏旦秋水平谿淹兩岼委巷泥濘人少過
小樓獨坐興愁歎忽聞有客欵柴扉言自北來情依依

懷中探出雙魚素一爲栢鄉一合肥二子致身霄漢上
俯念貧交猶不忘招我燕山同嘯歌何事江淮日飄蕩
身賤年年輕遠遊來朝便欲具扁舟丈夫海內存知己
妻子饑寒何足憂

哭靳茶坡先生

時與潘江如張
虞山同拜其墓

八年之內六過淮每一停舟訪君齋君聞我到必狂喜
相攜縱飲中心諧今年過淮君已死寒風慘慄傷子懷
急尋其子問其墓墓在城東石塘涯明晨欲往呼小艇
恰有潘張二老偕出城十里見高塚知君於此藏形骸
去冬執紼阻江水此日炙雞陳土堦仰天一慟不能止
潺湲雪涕沾芒鞋憶君稱詩霸淮右雅音疊奏無淫哇
晚航麴蘖故頽放餘波亦足風吾儕賢嗣收輯三十卷

其身雖死名不埋獨惜平生重意氣舊交零落音塵乖
白楊從此聲蕭蕭黃鳥無復鳴啾啾暮歸僧舍擁衾臥
庶幾魂夢來相依

叶按古詩君懷良不開張安將何依

柳冠道人歌

爲張虞山作

柳冠者誰張四愁萬里歸來自瓊州海濱拾得小椰子
巧製爲冠加白頭問君如何學此欵朔風蕭蕭鬢毛短
若令臺笠與緇撮魯叟無庸嘆微管

元旦

以下甲辰年作

正月上旬逢甲子農家爭道是豐年今年甲子爲元旦
更覺農家笑語偏我有山田在江北身在江南收不得
祇應賣却江北田自種江南田始食

去歲冬晴無雨雪草根蝗蝻恐未滅上旬甲子果豐年

先春合有冰花結是日午餘天色黃夜深寒氣侵人牀
曉來瑞雪已盈尺秋稼如雲定可望

百歲翁歌贈趙撝謙先生

弱齡好神仙頭白無所遇豈惟神仙無耄耄亦罕赴良
以世運促人命修短同何圖來濟上得見趙仙翁翁生
嘉靖之乙丑閱盡滄桑何太久今年甲辰正百歲正月
下旬介眉壽自言家世本閩人卜居寧陽沈水濱祖年
百三父百二皆以學道全其真道家往往煉黃白或言
容成御女術翁斥此輩爲妖妄惟寶精神戒母失蚤歲
連生十二男孫與曾玄三十三忽逢世難遭殺戮子身
逃劫漳河南八十以後重娶婦復生十男十二女長男
成立幼成童不學神仙學商賈翁今百歲春秋高雙瞳

炯炯察纖毫耳雖微聾不妨聽手足便利身堅牢飲啖
兼人殊不覺知翁腸胃有橐籥若非相火保龍雷焉能
上壽侔龜鶴況翁相地術尤奇理數洞徹心無疑不待
登山暨臨宅披圖禍福先知之我聞荆楚間亦有彭仙
翁其年百餘歲其道與翁同只是彭翁好逃劫頻改姓
字輕遠涉翁言明夏是劫年亦欲預逃之建業翁若來
建業訪我青溪邊我願爲弟子杖屨相周旋自知根器
薄曷敢求神仙但祈導引却病延餘年

畫松行荅王東郭見貽之作

婿安節原名
句字東郭

莫愁湖邊雲物青有翁四十兒廿齡讀書萬卷不求仕
却於窮巷甘沈冥厥子生來更奇絕學詩學畫意全別
胸中蕩滌無纖塵筆底蕭寒似晴雪一朝過我草堂來

主人偶出失趨陪，空壁舊存梅竹影。
嘉賓坐久心顏開，君歸便作古松樹。
矯若蒼龍出雲霧，上枝插漢下拂淵。
高者扶疎低屈注，貽我草堂縣正中。
臭味恰與梅竹同，吾衰愧此歲寒友。
客至但聞巖壑風，復題長句古松旁。
主人吟翫喜欲狂，何以報之惟橘酒。
待爾父子重過傾一斗。

京口與陳翼仲飲酒家作歌

潤州故人談與潘，一往歷下一桑乾。

時談長益在山東撫軍幕潘江如同

范翁生入燕

老夫過此無可語，扁舟小泊京江灘。
是時定海

將軍宅江寧，陳生爲上客。乍聞我到出城來，從者攜錢數千百。
楊彭山下寺新開，翠竹青桐絕點埃。僧厨不惜供茶笋，梵律未許移尊壘。
笑指河橋幙非遠，沽酒送行

情繾綣酒罷予登茗水舟汝亦入城天色晚

雪溪觀水歌

十日黃梅雨不歇千山萬山水爭發青桐門外勢滔滔
白石橋邊聲汨汨今朝天氣喜初晴有客相邀出郭行
行人試聽潺湲水不是茗聲是雪聲

贈張禹邨

古人有慕藺相如或慕顏曾伍子胥取其姓名作名姓
因而百世垂令譽今人嚮慕古人少況乃命名從幼小
前賢且不解師承近代風流復誰紹潤州張子始成童
作詩作畫靡不工厥名曰龠是何意云慕龠山期與同
老夫薄劣安足數縱有詩篇盡愁苦妙年底事獨相親
良以若翁謬稱許若翁風雅自翩翩毓秀鍾靈非偶然

丹青已入倪黃室詩法還從杜白傳

贈喬孚五

先朝詩人喬白巖曾官司馬來江南品題山水好刻石
至今遺跡諸伽藍公有從孫曰孚五能以風騷繼其祖
筆端皎潔無纖塵胸次寬平絕城府長夏偶爲茗雪游
與予邂逅情相投僧房咫尺頻來往雅詠三篇足獻酬
少年才調知君少更望苦心窮窈窕他時鼓枻過邗溝
定向君家憩亭沼

南潯歎

南潯一邨當一縣財貨雲屯商賈便中間鉅富者誰子
擁貲百萬人所羨百萬金錢是禍胎片時飛威如浮埃
匹夫無罪懷璧罪盡室誅夷亦可哀

送湯宮若歸南豐

吳興六月逢湯生其年正少才正英爾寓鴻禧我鐵佛
名寺晨夕往還無送迎手持書義三百首銓下閱之老眼
明以此進取必高第何難黑頭加簪纓爾獨甘爲布衣
士讀書所志非科名良由若翁泊若祖國恩深厚難忘
情此邦名士趙孟頫懷祿貪勢慚其兄是何年少遽能
爾令人感歎中心傾八月我歸自茗水九月爾亦來南
京停舟見訪桃葉渡促裝便欲盱江行自言客久當省
侍明歲重來石頭城長齋斷葷復止酒何以致欵惟藜
羹江邊相送無他語莫犯風波莫遇兵

王左車見訪不值却寄

前日訪君湖上村君先揆菊江東門今日訪我溪上宅

我亦看花市隱園來往迢迢十里遠兩番不遇人空返
霜晴重與訂佳期手摘寒蔬婦炊飯

胡靜夫見訪草堂有贈

老我卜居青溪里爲傍詩人顧與紀顧翁謝世歸山丘
紀叟移家涉江水草堂冷落柴門秋行吟澤畔思悠悠
此間詞客甚鮮少雖有佳篇誰倡酬胡郎父子故風雅
君更登壇稱作者一居城北一城南容易何能共盃斚
冬晴步趾向南來手攜吟卷皆新裁牀頭濁酒聊堪語
林際斜陽却又迴稍閒便欲尋君去只愁道遠難相遇
安得青溪作比鄰往來觴咏無朝莫

贈湯巖夫

今人讀書不識字下筆淆譌十三四許徐訓詁自分明

爭奈人都不省視昔者吾友戴敬夫磨礱字學天下無
子少竊聞其緒論雖知梗概心猶麤中年奉教蕭尺木
尺木篆隸精且熟每與予言輒終夜字學稍知其節目
平生結交多俊民此道茫昧恒失真何期晚遇湯玄翼
奄有二子成三人猶記魯江同作客頗領微言恨匆迫
別來十載夢魂勞老去重逢鬚髩白閒時緩步過吾廬
相對惟應話六書秦漢晉唐體多變那能貫穿爲發摠
當時戴蕭所未悉今日詢君得其實我亦著書曰蒙求
乞君釐正方成帙

贈吳子班

樓山先生死秋浦浩氣英聲自千古巢破寧論黃口兒
天遣孤雛脫豺虎藏匿溪山二十年苟全性命非徒然

孟山續集

卷二十一

博覽羣書頭角異連生三子宗支延記爾小時曾一見
二十年來未謀面今冬雨雪到南都訪我草堂情眷戀
若翁曩亦居此園陳生其年方及門我偕朋輩日過此
文義詩篇恣討論朋輩如今皆物故惟餘白髮傷遲莫
昨歲陳生飲草堂俯仰欷歔作長句爾今來此復含辛
把酒沈吟淚滿巾投我短章亦淒苦異時精進俾先人
樓山先生古文好聞說重編付梨棗明春幸寄一函來
老眼摩挲以爲寶

施愚山少叅加惠乳山林翁不一而足詩以紀之
林翁八十有六年敝袍遮體冬無綿兼之眼昏復便秘
欲求藥餌囊無錢其家雖有丈夫子貧劇僅能供菽水
亦有良朋共倡酬杯酒殷勤而已矣施公奉使過長干

枉駕衡茅興慨歎曾貽苧帳防炎夏又製綿袍禦苦寒
更憐翁病日衰老斟酌醫方何藥好捐金爲市地黃丸
潤臟平肝以爲寶翁言使君義誠高老夫貧病猶可熬
薄田預徵明歲稅縣吏追呼命莫逃公聞斯言容慘戚
倒篋傾囊渾不惜代輸田賦免憂煎且得逍遙過除夕
吁嗟古道今已稀使君高義何巍巍佇看廣廈勢突兀
大庇天下寒士皆春暉

西府海棠歌

以下乙巳年作

白下城南多古樹昂霄聳壑無其數一自官司造海船
紛紛斬伐誰能護松栢凋零既可傷因之花竹皆罹殃
往時叢卉家家有今日名園處處荒惟餘天界老僧室
谷語師檐際海棠猶茂密二月花開似落霞三春客到無

虛日老僧作歌與客看追思往昔興慨歎趁此春晴亟
游賞莫教風雨又摧殘

東園杏花歌

長板橋頭春水平魏公東園最知名其中文杏千百本
二月花開似錦城世事滄桑主人換東園入官良可歎
墻垣雖毀杏猶存每到青春仍賞玩游人日日來園中
花下提壺歌笑同不知誰觸主人怒斬伐爲薪一旦空
此地犁鋤種蔬菜遠人只道花猶在清明携酒來看花
忽見朝畦發長慨我家正與東園鄰醉臥花間秋復春
今朝對此增惆悵回首鍾山益愴神

贈文及先

先朝篆刻誰第一文翁三橋故無匹其法全師李陽冰

意態纖毫不相失今人好奇務詭秘反謂此翁爲平實
六書譌謬良可嗤古道陵夷非一日三橋從孫曰及先
家法升堂兼入室胸中體勢最嚴謹腕底風神更超軼
曾携所作游京師孤卿以下皆屈膝年過七旬神轉王
不肯輕爲人捉筆愛我獨貽三五章寶持不翅金千鎰
何以報之惟短歌歌聲亦若金石出

爲彭旦今母夫人壽

瀨上彭君別十年暑中訪我青谿邊形容較衰興亦減
獨有故舊情依然問君何之指江縣俯就一官羞滿面
自言有母七旬餘家貧無以供珍饌且喜朱方是比鄰
扁舟迎養不艱辛三牲五鼎尋常事爭似湖山魚笋春

題王阮亭儀部像

嘉隆年間詩得名七子尤推歷下生其聲砰轟氣麤莽
雖有音格少性情當時人奉爲山斗李亦自誇燕許手
百年以後虞山翁引繩披根發其醜辟如陌上桑一篇
改竄古句多拘牽其詞猥鄙殊可笑劣得盛名吾惑焉
山東風雅誰第一新城王家故無匹季木開先稱作者
貽上後來更挺出昔君弱冠通籍時都門一見如故知
曾窺行笈皆鴻寶竊歎詞林是總持明年佐郡來邗上
詩思益勤懷益曠每逢山水必搜尋但遇良朋恣酬唱
裒成巨集曰漁洋開卷無非明月光前人白頭尚未到
君方綠髻遂兼長今轉潛郎入禮署過江別友行將去
手持一卷抱琴圖顧我茅堂索題句武林戴生工寫真
頰上三毛信有神戴生繪圖諒非一風雅何曾得此人

世俗所好榮名耳畫圖亦復施金紫知君所重不在茲
但論其詩餘不齒濟南既有王阮亭山東無復李滄溟
屈指何人堪比擬萊陽宋與諸城丁

宋荔裳
丁野雀

金陵五峰行送王阮亭祠部北上

阮亭先生官揚州江淮山水無不搜最愛舊京多古蹟
公餘輒作金陵游燕子磯邊每停櫂鳳凰臺上幾登眺
雨花木末恣扶筇桃葉青谿仍垂釣城南牛首與獻花
城北攝山復寶華皆因僻遠不曾到見人惆悵還咨嗟
今年五月遷官去重訪金陵舊游處拾遺補闕諧素心
捫葛攀蘿何足慮先尋佛窟次幽棲邀我同行路不迷
曉瞻雙闕雲生岫夜臥層樓月滿谿明日驅車帝城北
攝山幽秀宵難測獨向溪林揆石泉更上危峰望京國

逶迤便入寶華山言訪律師叩禪關此山古蹟雖鮮少
手掬龍湫亦動顏五日之間五峰徧君始回舟返江縣
江干相送惜分手重約新秋至淮甸七月涼颺抗去旌
我來折柳難爲情知君厭聽俗人語爲賦金陵五峰行

贈戴山人葭湄

前年冬月涉邗水董相祠邊訪知己武林戴生居隔垣
爲我曾圖四壬子柴桑範度本天人杜白風標並絕塵
何幸置我於其側意態相關若有神因持此圖示同調
人人歎息誇精妙先是曾鯨與謝彬兩公心法惟君紹
今年夏月復來茲何以報君惟此詩西園雅集成千古
全賴龍眠李伯時

汪左嚴招同孫豹人汪秋澗及令兄舟次叔定季

角泛舟紅橋作

蕪城之東河水漲浮查直出隋堤上主人好客移尊罍
畫舸乘風入清曠須臾打槳過紅橋浦潏平分十里潮
楊柳菰蒲皆浸沒藕花蓮葉未飄搖暫憩重陰法海寺
無數蘭橈先後至朱簾乍捲見青娥赤日當空下秋翠
老夫豪飲興悠哉倏忽狂飈自北來却笑秦翁憂且懼
便令舟子放舟回君不見主人情繾綣欲去平山中道
返稍涼再作蜀岡遊小艇沿谿莫辭遠

楊東子宅題九龍山樵卷

九龍山樵孟季良元末隱居惠山陽中遭散亂走四方
晚歲歸來鬢已霜重向山阿葺茅堂躬耕乃在先壠旁
孟家兄弟皆冠裳君獨不仕安農桑此意孤高不可量

况復詩畫能兼長自寫惠山圖一張題詩其上猶芬芳
此圖零落誰珍藏成都公子人姓楊廣陵七月秋氣涼
公子燕客傾壺觴因展此圖發奇光摩挲吟咏喜欲狂
我曹志節遙相望對之愈覺增感傷卷尾重題三五行
九龍山樵曷敢忘

贈吳仁趾

孫豹人家見爾篆汪恥人家見爾詩詩稱妙品篆神品
是何年少能兼之恥人云爾茅山去旬月還當來此處
江上風濤多險艱過期不來良可慮新秋大水通江淮
爾忽停舟到悔齋我同孫老衝泥往夜話鐙前心事諧
尋取篋中詩相質皎如秋水芙蓉出詩雖雅調猶可企
篆則絕技無其匹仁趾仁趾善自珍文人慧業皆前因

年齒漸加學益進大名字宙垂千春區區富貴何足陳
送徐子九歸雲間

昔游江楚經亭州與君一見深相投既維我馬授我館
復醕我酒衣我裘是時羣盜山中起日夕攻城樹軍壘
主人才智有餘閒攜客城頭看秋水羈遲旬月自懷歸
中夜揚鞭出重圍分金雖少情則厚臨別河橋淚欲揮
別後相思不相見逢人輒問及愚賤也知解組歸湖山
欲訴離情隔鄉縣今秋相遇青谿邊屈指睽違十八年
顧我吟髭已衰白輪君青髻尚依然尋呼小艇過茅宇
倉猝村酤佐雞黍本期聚首再盤桓無奈歸帆又延佇
明年八月秋花開送兒鄉舉還復來艸堂咫尺鷺峯寺
一日相過定幾回

喜關中王幼華見訪艸堂

廣陵城西木蘭院與君僧舍初相見是日偏逢嶽降辰
旨酒嘉魚聚羣彥我年最長居上頭袞袞談詩夜未休
坐中欣賞君第一從此心期膠漆投來朝復飲汪生處
盡日流連不忍去刻燭爲題壬子圖筆端疑有神靈助
別後東西各一天韶光彈指歛三年雖無尺素通音問
聞說麻衣守墓田老夫結交徧海內風雅如君得幾輩
朝邑三原與邵陽文采風流果佳對霜天寥廓雁聲哀
夜夜秋燈花蘂開私心必有良朋到僻巷俄驚之子來
秦關吳苑三千里匹馬單車渡江水君言南國多交游
獨有僊山是知己手持哭母詩一編其音淒楚情纏綿
小人有母尚未葬讀此傷心淚泫然又言明歲服將闋

授官傲倖吳與越欲取秦中先輩詩遴選成書付剞劂
並取僊山所著書分金刊布垂令譽感君高義諒不爽
顧我薄福知何如白下青谿桃葉渡豆架瓜棚於此住
但閒徒步卽來過莫怪貧家無禮數况兼令節是重陽
攜手同登石子岡方景祠堂一杯酒他年覓夢不能忘

吳平露齋頭小飲作歌

欲雪不雪天氣寒千山萬山風葉殘茅堂晝閉罕人事
日暮杖藜尋所懽會稽吳郎江海客假館遼東太守宅
門前狗馬雜囂塵樓上琴書自香澤論文之暇喜攻詩
贈我長篇絕妙辭等閒一見必呼酒况是霜寒木落時
憶昔驅車邊塞遠逆旅相逢情繾綣南歸何幸復銜杯
獨惜談翁猶未返

寄蕭尺木先生七十

國朝書苑誰集成啟南徵仲垂大名兩翁年皆至耄耄
天生人瑞當昇平後來繼起者誰子于湖遺民尺木氏
畫在兩翁伯仲間風義孤高亦相似獨惜君生離亂時
中懷抑鬱人少知讀書萬卷詩千首自晦寧稱老書師
我昔羈棲赭山日從君問字膠投漆別去江干十四霜
羣疑滿腹無由質屈指今年是古稀雲山相望情依依
定知睂壽同文沈他日重過願不違

癡翁嫁女行

金陵高士史癡翁有女及笄其壻窮阿婆誅求行六禮
六禮不備媒不通以此蹉跎年歲久歸妹愆期尚未偶
癡翁苦勸非一朝阿婆堅執但搖手適逢元夕放花燈

天街男婦聲沸騰阿婆亦欲攜女往阿翁陽爲好語謦
是日過往壻家去告汝與衣爲治具夜深妻女看燈回
引過其門聊歇步須臾秉燭羅酒漿阿婆驚顧不及詳
翁謂其女同壻拜今宵合卺時日良飲罷夫妻自歸舍
向平從此完婚嫁次日喧傳都市中癡翁嫁女成嘉話
我今嫁女亦類茲納幣催粧皆省之親朋聞者多相笑
試想癡翁癡不癡

京口喜遇孫豹人

豹人去冬與舍弟退谷同游和
州退谷暴卒豹人爲之治喪故

云 以下丙午年作

我欲渡江去君先渡江來江城忽相見攜手登高臺爲
言昨歲歷陽事霜天白雁毛羽摧同舍非君匍匐救旅
覓飄蕩焉能迴感此益重友朋義在原急難何有哉人

生壽命等朝露眼前富貴俱浮埃惟有痛飲足娛樂况
逢知己無疑猜天晴散步出南郭郭外櫻桃花正開

送韓叔夜歸鄆陵

韓翁五十兒始生兒生四月翁遠行阿姆抱兒立門外
看翁上馬難爲情此去京都因謁選分符遂得永嘉縣
是時海岬多兵烽憂危不敢攜家眷邨知南方作令艱
十官九罷於其間罷官猶可仍降罰羈絆糾紛豈易還
今春始得歸鄉里問兒長成十歲矣道途勿復再淹留
入門相見應狂喜

贈陳延喜

君年長我剛一歲白頭蕭灑風塵際有子魁然三丈夫
朝昏色養羅甘毳家人生產了不聞提壺挈榼常醺醺

醒來但寫花前句吟罷還看江上雲人間樂事誰如此
濁世浮名安足齒我過半百尚無兒升斗于人應愧死
春日同孫豹人陳延禧楊襟海呂又薛飲酒家

潤州城南多酒家四山無數櫻桃花小園水竹有幽致
海蛤河豚風味嘉我因陳翁交呂子意氣蕭爽兼豪華
是日千錢杖頭掛指點銀瓶安用賒獨我冷飲衆驚異
方出本艸無疑差歡笑移時爛熳醉歸來山徑皆欹斜
主人好客情未已更期明日游江涯

是日呂生爲主

二周行贈周建西子常

二十年前客京口抵掌論詩多好友
卯沂公徐曼若秦臣薄陳尊已談潘八公俱白首
談長益潘江如錢開
張則之
後來繼起者爲誰二周年少才並奇家藏鄴

架書能讀詩學唐風志不移今春我到三山下見君佳
句何妍雅君尤篤好命山詩借我全編悉抄寫以此忘
年稱賞音朝昏相對惟長吟他時京口論詩者屈指當
推君竹林

磨筭山下酒家同孫豹人陳其年談長益何雍南
程千一小飲作歌

無端作客來潤州轉因匱乏成淹留賴有同人日相狎
狂歌痛飲能消憂談翁塞上十年別此地重過頭似雪
繼起誰登風雅場何程二子俱魁傑客舍論詩見訪頻
况逢詞伯來江濱關中孫老才華健陽羨陳生格調新
六人相聚緣非偶屢出城南看花柳地主青蚨頗不慳
山家綠蟻惟吾取底事停杯忽改顏陳生明早渡江關

予借孫老亦將去他日難忘戴女山

唐筭山乃戴顓女守志處

程崑崙別駕招飲潘園賦謝

同集者孫豹人陳其年鄒訢士談長益何

雍南程十一

京口新屯數萬兵民雜處多喧爭誰其治之郡司馬
殫心調劑人稱平所以旦旦趨公府案牘如山意良苦
飢時暫餐還不能那得閒情到園圃使君才智綽有餘
賓客來過日不虛開樽每在夜初靜抵掌無非詩與書
獨惜春光隨逝水雙眼何曾見花蕊偷閒載酒出城來
名客看花盡知己竹裏行廚傍水邊桃花雖落李花妍
莫愁郭外兵兒折但恐來朝花朵薦况復東風吹柳絮
坐中客亦東西去今朝對酒不盡歡他年會合知何處

常州贈王詒白廣文

龔山續集

卷二十七言古

三

司空山下初逢君，準擬六翮翔春雲。豈知蹭蹬不得意，
白露青氈猶廣文。人道廣文官獨冷，我覺此官兼吏隱。
回首金沙諸貴人，一朝奇禍皆顛隕。君去昭陽萬水間，
故鄉憂患了不關。稍轉毘陵亦善地，頻宮松竹何悠閒。
我夙與君稱莫逆，同心離居愁思積。都門一別成九年，
京口重來淹數夕。無端又欲泛苕溪，聞說登艫意慘悽。
城外杜鵑花正發，花前痛飲惜分攜。

桃葉渡歌

青谿女子王家妾，一喚桃根一桃葉。王郎曾作桃葉歌，
此地相迎不用楫。自晉迄今千餘年，渡名桃葉情依然。
經過才子及才女，佇立樓邊復水邊。乙酉丙戌何人者，
改渡爲橋便於馬。徒梁之制本不堅，利涉之名亦不雅。

二十年間橋屢摧更有俗僧何處來募金樹石雖能久
渡口煙波安在哉人言此橋不易致我道此僧實多事
淮水澄泓渡自佳問名猶不忘所自無端改作何太癡
風光應不似當時老夫尚記承平日汝輩少年焉得知

題孫無言新居

桴菴往歲移居時予與軫石漑堂同贈詩

孫無言別號桴菴王于一

別號軫石孫豹人別號漑堂

其詩限韻各九首此事咄咄人稱奇軫

石合書一長卷囑爾什襲珍藏之未幾玉樹委黃土予
與漑堂俱白髭問取此卷復展看光焰萬丈何陸離固
知人無百年壽惟有筆精墨妙千古垂爾數移居不勝
賀我又不善爲祝詞所願爾子爾孫寶此卷傳之異代
永不虧

郝羽吉宅同孫無言豹人汪舟次夜集兼懷吳賓

賢

三年不見郝山漁

羽吉別號山漁

每過蕪城訪君廬聞君負米

去江縣引領南望空躊躇今歲重來主人在畱客盤殮
如有待病夫脾弱忌飲啖僅劇遂忘鑒所戒况逢老友
二孫來汪子比鄰不用催獨念吳郎東海畔安能涼夜
共銜杯

江上短歌

南風正烈北風微江水奔流蕩炎暉變江買舟向京國
三夕纔能抵蕪磯不如策蹇行江岸無論陰晴一日歸
秋夜邀同汪舟次程飛濤周雪客潘蜀藻王安節
秦淮小泛作歌

今年三伏苦無雨七月終旬猶酷暑柴門倉猝來舊交
艸舍炎蒸愧雞黍因呼野艇泛青谿恰喜涼風生遠渚
雖無蘇小凭紅欄尚有何戡歌白紵興懷往事不勝情
欲展愁睂向誰語我甘瓢笠老漁磯君望烟霄合鵬舉
合肥贈秦虞桓

與君定交昉丙子是時藉藉稱名士睥睨青雲足下生
不信中途困泥滓如今丙午三十年白頭相見情依然
君有丘園恣高臥鴻妻驥子真神仙我老無家更多難
百事輸君自悲歎惟餘詞賦畧相當索酒狂吟至夜半
故人聚集情正懽來朝又欲去江干折柳河橋重回首
巢湖秋水夕漫漫

贈孫秋我

少年策蹇走華陽與君旅舍傾壺漿別來陵谷凡幾變
俛仰之間三十霜今歲偶來箏笛浦秦子齋頭共雞黍
嗟予短髯已成絲怪爾長髯黑如許新詩見贈似瑤琴
欲報慚無玳瑁簪聞有芳園栽萬柳垂條拂水長陰森
堂名爲取麴塵字嫩葉初黃更賞心

秋我有園栽萬柳
乞于堂名于名曰

麴塵

贈閻古古丈

我年弱冠家南京雅慕沛縣閻先生是時先生亦知我
各賦一詩遙寄聲十載相思不相見準擬驅車涉淮甸
始愁兵火道途艱尋痛京師滄海變先生意氣慨以慷
報韓欲效張子房上書時宰觸忌諱隱匿姓名之四方
踏遍西南好山水二十年間頭白矣司寇龔公念舊交

特疏令君還故里今秋鼓枻肥水來與我邂逅襟顏開
容鬢雖衰氣猶壯新詩骨格何崔嵬握手經旬又分手
欲展離情惟有酒城頭明月正高寒一日相過飲一斗
九十九翁歌

和州城南五六里有坊八尺高林起旌表州民沈伯端
大字誰書州刺史沈翁行年九十九妻年減二同白首
亂世遐齡豈易臻偕老尤爲世稀有我今騎馬此地過
下馬訪翁入烟蘿問翁何修得此壽翁慘不樂淚滂沱
自言家道昔頗足有子三人耕且讀一朝寇至俱被戕
二老潛身匿山谷敝廬旣燬田又荒改禾種竹爲資糧
往時妻在猶有伴不幸去冬妻病亡子身熒熒無所倚
朝夕艱辛是蔬水三旬九食長苦飢殘喘雖生不如死

幸蒙刺史仁且賢賜我坊表光餘年豈知多壽翻多辱
凍餓孤嫠實可憐我聞斯言發長喟耄期自古稱人瑞
安忍頑祥委溝壑歸語使君重作計

送姚六康之任石埭

昨歲君從嶺表來停舟訪我青谿隈八年分手離情苦
一夕談心笑口開問君別後何所事君言困辱不得志
與其避俗常畏人何如服官且玩世以此謁選入蕪關
循例當邀一命還江南山水夙所愛安得分符宣歙間
仲夏偶然見除目知授專城九華麓其地雖僻田賦輕
况是頻年禾黍熟君發新硎刃有餘彈琴之外讀羣書
甘心淡薄應無取分潤貧交諒不虛八月之官先過此
我適渡江涉肥水艸堂不獲迎軒車芳訊猶然寄知己

明年春水漲青溪期我扁舟秋浦西
九朵芙蓉插銀漢
合從仙令共攀躋

嘉興贈曹中峽

我來醉李天正寒寄書石門期所懽
君聞我來卽命駕
不辭風雪過湖灘
霜晨見訪楞嚴寺握手慇懃感同志
黃昏置酒臨前除挑鐙却話金陵事
金陵王粲才縱橫
君之彌甥我館甥飛揚跋扈人所羨
酷似其舅非虛名
答陳堯夫見贈

朔風凜冽號空林香臺夜雪三尺深
旅人坐困不得意
擁爐且作寒蟲吟叩門相訪者誰子
贈我長歌書蒲紙
客窗展讀未終篇頓覺春光放梅蕊
我昔游禾交若翁
見君總角方成童三十餘年重至此
君才卓犖爲士雄

亂世功名非所好獨于風雅有深造虞山蒙叟君所師
歷下瑯琊何足道

吳興贈嚴修人進士

以下丁未年作

前歲我來苕霅間與君杯酒時往還不知君有贈我序
古義高深莫可攀今歲重來舊游處劉生出此延吾譽
問君何以不見投君言文成客已去詩文妙處惟一真
真之至者能通神俗眼塵昏那解此但誇藻績爲鮮新
老夫攻詩四十載堅持此說終不改世人疑信何足憑
千秋自有賞音在誰知吾世便逢君不待求請舒鴻文
旣非勢利相要結便是交情無此慙良由肺腑有深契
感此龍鍾淚沾袂因君遂想異代賢豈無知已如君輩
詩篇而外古文詞茅公鹿門我所師鹿門之後君繼起

菰城長有雙瓊枝老夫苦吟同傲帚何幸附君名不朽
開篋還傾所著書更乞片言垂永久

訪李望之山人兼懷王徵宣孝廉

梅華千樹沈家園欲開未開香氣繁
李生借此作書屋早春似臥羅浮村
我來相訪孟陬月東風晴暖花初發
知君垂橐無酒錢待客攜尊坐林樾
王郎咫尺吟興多歲杪驅車北渡河
尚有良朋費張葉幾時花下一婆娑

贈劉民長茂才

老夫好友宣城多強半下世今如何
獨有臨江使君在同心離居亦可慨
今歲偶游苕水東與爾邂逅菰蒲中
爾才甚高年甚少出篋詩文並佳妙
不嫌老馬猶問津此意潏洄更絕人
他時努力爲詞伯莫忘吳興同作客

老蕩子失意行爲漢陽李雲田作

八年不見漢川老今日相逢秋浦道其容蕉萃齒凋零
却有詩篇字字好君詩古健霜柯撐獨於閨閣多柔情
牀頭一冊更珍異乃老蕩子失意行誰其作者龔司馬
麗藻妍詞妙天下吳詹事與曹侍郎亦復魚魚而雅雅
從此繼作皆豪賢長歌短詠何紛然李生大笑向予說
此冊待君將十年夙聞君有寶鑑氏蕙質蘭心稱女士
豈甘通德伴伶玄誤學文君歸犬子斯人才色斯世無
寒酸攫得分已逾便應琴瑟長相守安忍舟航又在途
飢驅出門猶可恕再娶茂陵天所惡莫怪閨人含怒嗔
尚冀狂夫當悔悟那知野性同飛花南北飄搖不憶家
曾游燕塞迷倡女又向蘓臺買俊娃黃金用盡轉多累

雖云得意終失意所以名爲老蕩子蕩子伶仃何足異
獨憐思婦守空房春日遲遲秋夜長吟成紈扇先垂淚
寄到雙魚每斷腸羣公題贈詩非一大約勸君歸去疾
人生半百成老翁愚夫亦解謀家室何況君家有異人
合師梁孟敬如賓舖糜啜茗天然樂絕勝窮途多苦辛
張司業有傷心句但願在家相對貧不願天涯金繞身

泉酒行柬姚六康明府

有客來從惠山南餉君泉酒三十甌君于葷腥一切戒
獨不戒酒取微酣却訝此間村醪薄雖有醇醲亦不堪
安得惠泉日在手其味清冽而旨甘譬如荔枝出嶺表
梨桃李杏皆懷慙勸君畱此自斟酌或與詩友供妍談
月明之夜入清署索飲一斗諒非貪只愁渴吻不能待

先乞三升療我饑

送盧升卿孝廉兼壽其母太夫人

仲夏偶來陵陽城
恰逢東莞盧升卿
升卿文章冠嶺海
十年前已聞高名
山城一見懽如故
且喜爲鄰谿上寓
誦君新詠濯冰壺
贈我奇文同寶璐
何事匆匆促駕歸
自言累夜夢親闈
八歲孤兒承母訓
兒將五十尚依依
母氏修齡八十一
人間景福應無匹
君猶祈壽九華山
孝子存心惟愛日
屈指中秋才到家
堂前蘭桂正開花
三牲五鼎尋常事
菽水承懽樂未涯

劉輿父挽歌

崇禎癸酉秋浦行
始交嶧桐劉先生
先生長我十五歲
猥蒙折節稱弟兄
是時君年已二十
少予兩歲才挺立

却因親故自貶損往往見推如弗及從此游君父子間
紵衣縞帶時往還忽逢世變峽川隱龍蟄鴻飛莫可攀
仍愁雲壑難安臥強君出試爲免禍辛丑相逢鄱渚邊
中夜談心淚交墮壬寅捧檄之都門仰首故宮聲暗吞
壯游不憚居庸遠歸路還瞻岱岳尊乙巳維舟石城外
遣使相邀聊一會見君半體患風淫藥餌無資飯粗糲
感懷爲送一篇詩勸爾殘年理釣絲那知一病遂不起
屬纊正當炎暑時去秋聞訃生芻闕直到于今棹始發
乍逢令嗣觸哀情欲哭荒郊待涼月吁嗟乎人生壽命
無百年惟有文章節義千古傳君家父子名不朽况復
兒孫才且賢

吳山賓見贈八分歌賦此荅之

今人字學總茫昧分隸二體亦不明旣以八分誤爲隸
因而稱隸爲真行秦觀洪适且如此餘子瑣瑣安足爭
八分者何兼篆隸篆取六分隸取二漢碑瘦硬能通神
唐碑肥軟少古意前人學者多唐碑漢碑寥寥不易致
我愛八分曾究心手摹四碑於孔林韓勅乙瑛書最妙
史晨孔宙亦可欽其一曹全購自陝五帖不啻千黃金
攜歸草堂日展翫誦讀之餘聊染翰臨池僅得其形似
精微尚恐隔河漢獨惜世人知者稀每將良平比絳灌
今歲偶來秋浦城故交喜見吳先生先生腹笥破萬卷
字學尤詳剖析精見我八分謬稱賞長歌投贈情非輕
歷序先朝諸舊德朗如列睂人罕識大小二篆生八分
自慙書篆腕無力丞相中郎法並傳從茲願以君爲式

題吳平露所藏倪雲林畫

以下戊申年作

人愛雲林畫我愛雲林詩其詩沖淡有真味其人高潔
良可思吳郎好古生來癖珍藏此幅同圭璧每逢嘉客
索題句焚香相對供朝夕客有持卷裝潢齊爲言松雪
畫且題吳郎掉頭不肯顧百趙焉能望一倪

送王暄文學博之官京口

潤州城西天下無三山奇絕如蓬壺城南諸剎亦靈異
碧澗青峰總畫圖我游江淮間已老諸郡無如潤州好
眷茲山水每流連况有詩朋共幽討爲客猶喜官如何
守令糾紛俗務多廣文先生最閒暇隨時可以尋煙蘿
王君夙昔耽風雅此地爲言更蕭灑羣山次第歸品題
他日停舟問杯斚

金上系集
胡母節壽詩

世變節義如輕塵男子猶然況婦人母能秉操植遺腹
子爲家寶孫國珍設令斯人是男子托孤寄命何足齒
古來伊周稱大臣稽其勲績不過此今年八十壽且康
善頌善禱人滿堂有客歌詩立堂下將以風世讀書者
送黎愧曾之任永新兼寄青原長老

靈山七十有二峰望中朶朶青芙蓉聞君佐郡官此地
曾上靈巖歷幾重今年量移吉州去先問秋山在何處
其峰亦有七十二白雲朝夕來琴署兩山作吏意如何
自是君身仙骨多青原古剎相隣近高興還期訪薜蘿
黎以廣信司理改補永新今廣信有靈山七十二峰永新亦有秋山七十二峰故云

送沈方鄴遊惠州

三年前欲之嶺海萬事糾紛期屢改今秋始附贛州船上客言尋海豐宰海豐宰是君婦翁厚贈不與朋儕同歲晚看山遍南越開春趨駕還江東江東山水宛陵好谿上梅花雜芳草祇應高臥讀羣書安用艱辛涉遠道況今天地災異多將來身世知如何陸賈千金裝不易丁寧歸路慎風波

爲姚寒玉六十壽

我聞秋澗姚先生當年南國垂大名文采風流未銷歇曾孫寒玉嗣英聲寒玉才如不羈馬詩情酒態狂而野有時噴發胸中奇千樹梅花任揮灑大者合抱小折枝風晴雪月無不宜更出新意采真瓣點綴筆端奇復奇曾爲我題四壬子鍾山花蕊供驅使又爲我塗草堂壁

根柯宛在空山裏乃祖秋澗雖云豪厥孫寒玉才更高
一生盛世一亂世顯晦窮通隨所遭今秋六十介眉壽
芳徑提壺皆我友莫嗟貧賤百年身翰墨流傳已不朽
喜白孟新錢季水見過小飲作歌

三十年前客舊京僦居石橋近雞鳴是時朝夕往還者
白生錢生及余生數子才華皆絕世反手青雲能自致
豈知陵谷遽遷移相期簪組渾閒事錢余蚤歲擲儒冠
與我同心終考槃白家兄弟有老母祿養未敢輕微官
小白公車入京雒傳食諸侯賤藜藿大白尚困諸生間
每逢舊友悲離索回憶當時俱少年如今霜雪已盈顛
所居南北又修阻累歲不得同栢棧草堂十月朔風冷
獨立寒塘看波影二子偶從谿上來急取村醪話蓬梗

一瓶未罄童僮歸相送河橋雨溼衣幾時再約余生至
竟日淡談願不違

桃花潭短歌

桃花潭中春水淡桃花潭上春雲陰雲陰不見古人面
水溪曾照古人心如何李白汪倫後雲水荒涼直至今
重至石埭訪姚六康明府

去年長夏之秋浦取道陵陽過重五是時賓客盛如雲
私念主人酬酢苦君聞我到轉開顏詩酒流連日不閒
昔人所貴謝仁祖豈在區區升斗間今年又涉新安道
路出長林踐霜草漫勞投轄滯遊蹤但乞興夫向晴昊
官舍蕭蕭退食時相期杯酒話離思文人作吏先風雅
剗剗無忘杜彥之

杜荀鶴字彥之石埭人六康許重刻其集

三月三日邀孫魯山侍郎飲李笠翁園卽事作歌

以下巳酉年作

老我卜居近秦淮性情慙直無與偕終日攤書閉門坐
等閒不涉淮水涯今歲春光已過半海棠木筆俱零亂
眼底何曾見一花鏡中白髮空嗟嘆我友孫公渡江來
特地扣門門始開爲言老興須鼓舞不應枯寂同寒灰
因問園亭誰氏好城南李生富詞藻其家小園有幽趣
繫石爲山種香草兩三秦女善吳音又善吹簫與弄琴
曼聲細曲腸堪斷急管繁絃亦賞心公聞我言意超忽
便欲相攜訪林樾來朝修禊是佳辰我爲沽酒供肴核
是日恰逢天氣晴羣花雖落猶滋榮莫嗟芳樹紅英少
且聽紗窓黃鳥鳴始似雛鶯出山谷漸覺悲風振林木

南詞北調各有情四坐悄然重舉燭孫公此際朱顏酡
謂我人生能幾何莫因衰白風情減更欲看花與聽歌

送鄧木上赴北雍

去年花時君召客芍藥闌邊浮大白今年花時客送君
牡丹亭畔惜離羣君今驅馬燕臺去金門蚤獻長楊賦
我亦扁舟吳苑行白髮飄零光景暮九月秋高聞好音
且偕師弟返園林東籬黃菊應無數重把香醪細細斟

送吳平露黔遊

南中正苦良朋少山陰吳郎交最好不分昏旦輒過從
各有詩篇共揆討花時把酒興悠悠底事依人作遠遊
黔陽道路六千里遄歸亦已經三秋知君遊策不辭遠
曾去粵東西復返主賓膠漆詎能離歲月崢嶸猶未晚

年來詩律已清新更欲精研似古人歸時買宅秦淮畔
期與金山長結鄰

王雲從招飲大觀樓感舊有作

君年三十與我友又三十年重握手世間好友多別離
未有似君離別久君才瑰瑋本天人屈指當爲社稷臣
豈知困頓老場屋一官小就江之濱我來訪君頻宮裏
形容憔悴非昔比歷數交游各死亡爾我尚存差可喜
來朝置酒大觀樓開牕四望延新秋忽聞哭聲慄不樂
知君伉儷情綢繆伉儷情淡那忍別招魂况近中元節
願留老淚養餘齡莫使眼枯空見血

橫江短歌

去年十月來橫江柿葉楓林猶未脫今年十月來橫江

白草黃茅氣蕭索天時暄冷何太殊亦覺人情分厚薄
人情厚薄何足怪仰面干人吾自錯莫愁風浪峭帆行
歸臥金陵瓦官閣

梁爾礪母夫人五十

母卽吾友與治女也

余去母家僅咫尺羣紀論交共晨夕稔識節操凜冰霜
真使鬚眉媿巾幗梅花正放羅壽杯身亦寒盡逢燠回
訓迪遺孤盛文藻且看孫子成驚才母也始無忝厥祖
備歷艱辛詎言苦我友顧叟老詩人自稱奇女廼卽姆
顧叟早歲悲斷絃有女事父甘旨全匪特紅餘嫺女史
父詩滾滾能誦焉貞風旣向詩中得兩家賴母盡生色
惟其素不慕浮榮自召三旌爲表德